

# Tutu e táxnūu San Pablu iña ñá ñuú Colosa

---

## Taxnūu Pablu tutú iña ñá ntoo ñuú Colosa

**1** Xu'u é Pablú u ne, pustru iña Jesúcrístú u, tsí kuan o ntío Xuva kō. Ntuví nti ení ko Timoteú ne, <sup>2</sup>taxnūu ntí tutú sāl'á iña ña ntákuinti'xe i Xuva ko nī Cristu, ñá ntoo ñuú Colosa. Na naxnuu viko Xuva ko ntō. Na tā'xi ña é kuntōo vá'a nto.

## Kaka'an ntâ'ví Pablu iña ña ntákuinti'xe i san

<sup>3</sup>Utén uten da ntáka'an ntâ'ví nti ne, ntánakué'le ntí sintiá'vi kuenta iña nto nta'a Xuva ko, Uvā Tó'o ko Jesúcrístu. <sup>4</sup>Tékú nti tsi dóo ntákuinti'xe nto Jesucristu, tsi dóo ntákuinima nto un ntíí ntíí ña'a, ña ntáduku ntée Xuva kō. <sup>5</sup>Ini nto tsi ntántétu nto é ni'í nto é ñū'u vá'a iña nto e dukún kán. É kūtuni nto iña i sá'a da téku nto tú'ūn va'á san, tú'ūn é nuu é ntaā i nté koo nakáku o. <sup>6</sup>Tū'ún san e téku nto ne, ñá te da dii ña'a ntákuinti'xe ña da mí'i ká ñuxiví san, vatā o dé nto da téku nto tú'ūn e dóo kakuinima Xúva ko kō né, kūtuni nto tsí ñi'vi tū'un é nuu é ntaā i. <sup>7</sup>Sá'ā é kūtú've nto

dá ká'an Éprafa, ña e dóo ntio ko, ña e dé tsiñu ni'í nti. Ini nto tsí ña kaxtuví mii ña é nakuā'a ña nto iñá Cristu. <sup>8</sup>Ñi'vi ña é kantaa ña nī nti tsi dóo ntákuinima ntó ta'an nto vata o tá'xi Espíritū san é vii o.

<sup>9</sup>Dukuān ne, vata tee dā'na nti e ntáka'an ntâ'ví nti kuenta iña nto nte ntúvi da téku nti. Ntaíkan nti te ta'xi Xuva kō é kūtuni nto nee iña e ntío ña é vii ntó, te tā'xi ña é kūtú've vá'a nto iña ña. <sup>10</sup>Ntaíkan nti te vii ntó vatā ó kantio é vii ña ntákuinti'xe i Tó'o kō sán, te ütén uten víi nto vatā ó ntio ña. Kidáā ne, kadiá'vi nuu i é vā'a e ntáde nto ne, díí díí ka vá'a kiní nto Xuva kō. <sup>11</sup>E dóo ió Xuva kō é vii ña é un ntí'í né, na natsu'un ká'xi ña nima ntó vata koo é na kūtíi nto é un ntí'í ne, ña nativi iní nto. <sup>12</sup>E dóo ka'nu kuini ntó ne, nakué'le nto sintiá'vi nta'a Xuva kō, tsí ntavá'a ña kō vata koo é kūvi ni'í ko iña ña e dukún kán dadíi ni un ntíí ntíí ña ntáduku ntée ña. <sup>13</sup>Tsi é nakáku Xuva ko kō dá ika o mí'i dóo neé ne, ta'xi ña é kuntoo dadíi o ni l'xā ña, ña e dóo ntio ña. <sup>14</sup>Tsi nakáku ña kō dá xi'í ñá kuenta iña kó ne, dē ka'nu iní ña ni kō kuetsí kō.

**Kuntōo vá'a o ni Xuva kō, tsí  
xi'í Cristu kuénta iña ko**

<sup>15</sup>Ña kúvi kīnī o Xuva kō. Dukuān né, taxnūu ña l'xá ña vata koo é kīnī o nté kaa ña. Di'na ña tuví ña e é un ntí'í é ió. <sup>16</sup>Kuenta iñá Cristú ne, dē kú've Xuva kō é un ntí'i, da nēé ka é ió e dukún kán, da nēé ka é ió ñuxiví sa, é un ntí'í é kúvi kini o nī é un ntí'í é ña kúvi kiní ō. Dē kú've ñá un ntí'í ntí'í espírítu e ntáde kú've. É un ntí'í de kú've ñá kuenta iña Cristú ne, ni iña ñá dī. <sup>17</sup>Nté dī'na tuví Cristu é un ntí'í né, ñá ña kade ña kuenta é un ntí'í. <sup>18</sup>Ña ntákuinti'xe i sán ne, vata kaa kúñu ñá ntáa ña. Dīvi ñá ne, vata kaa ñá i iña kúñu ñá san kaa ña. Tsí dukuān tuví ña dá iñi ntu'ū ne, di'na ña ntóto ña dá xi'í ñá, vata koo é ñá ña kodo nuū ña é un ntí'í. <sup>19</sup>Ntio Xuva kō é koo dadíi iña ñá ni l'xá ña. <sup>20</sup>Ntio Xuva kō é kúntoo vá'a é un ntí'í é de kú've ña kuenta iña Cristu é xi'í ñá ntiká krusi kan, é un ntí'i, kuān té ñuxiví sa tuví, kuān té e dukún kan tūvi.

<sup>21</sup>Dí'na ne, ñá ni iní ntó Xuva kō. Ña ni ntío kuē'en ntó ña, tsí da mii e dóo inchú'vi nto ña, tsi dóo kini o dé nto. Ntá tsi e náki'i Xuva ko nto <sup>22</sup>kuénta iñá Cristu dá xe'é ña kúñu ñá é kúvi ñá ntiká krusi kan. Kuan ō dé ña vata koo é kúvi nto iña mii ña, xoo é ña tuví ka kuétsi i, xoo é ña dentú ka nima i. <sup>23</sup>Kantio é kuntikin va'a nto e ntákuinti'xe nto. Ñá ku natívi iní nto. Ñá ku xtuví mii nto e ntákuinti'xe nto tú'un va'a san e téku nto. Tú'un sa'á ne, ntáka'an ntódo ña'a dá kani ñuxiví san. Xu'u é Pablú u ne, ñá ña kade ú dī.

**Ntáde tsiñu Pablu ni ña ntákuinti'xe i**

<sup>24</sup>Dōo diní ko tsí kanto'o kó kuenta iña nto, tsí du'vā ó kanto'o kó vatā o ntó'o Cristu kuénta iña ña ntákuinti'xe i. <sup>25</sup>E tá'xi Xuva kō é káka'an ntódo u, é ká'an u ni nto ūn ntí'í ntí'í tú'un iña ña. <sup>26</sup>Tá'xi ña é ká'an u ni ntó tú'un ñá é tuvi xu'u nte éma tsi, é ña ni tēkú ñata kō. Ntá tsi e tá'xi Xuva ko vé é kūtuni ña ntákuinti'xe i ña. <sup>27</sup>Ntio Xuva kō é kūtuni ñá'a, ña é ña te ña Israee, tsí ña te nté kaa va'a nuu i sá'a é tuvi xu'u. Sá'a é tuvi xu'ú ne, kani tú'un tsí nuu Cristu nima nto. Dukuān ne, ntantéto nto nēe e dóo va'a iña nto nta'a Xuva kō.

<sup>28</sup>Ntáka'an ntódo ntí iñá Cristu. Ntaxéle ntí itsi, ntánaku'a ntí un ntí'í ntí'í ña'a vata koo é kútú've vá'a ña'a san iñá Cristu. <sup>29</sup>Dukuān ne, kade tsiñu ú, kaxió ntii ú vatā ó kata'xi Cristu é kúvi víf u.

**2** Ntio ko é kūtuni nto tsi dóo kaxio ntii ú kuenta iña nto, kuenta iña ña ntántoo ñuú Ladicea, kuénta iña ña'a, ña é vata kiní nuú ko dī. <sup>2</sup>Ntio kó te kīf nima ñá, te kudadi ña ni tā'an ña tsi ntákuinima ñá ña. Tsí ni'i ña é vā'a kídaa tē kutú've vá'a ña, te kīni vá'a ña nuu i é tuvi xu'u iña Xuva ko, iñá Cristu. <sup>3</sup>Tsí nta'a ña vé'xi é un ntí'i nuu i é kutú've kō, é un ntí'i nuu i é kūtuni ko. <sup>4</sup>Kaka'an u sá'a ni ntó vata koo é ña kúvi kaní ntá'vī ña'a san nto da dóo vá'a ó kaka'an ñá, kuiní nto. <sup>5</sup>Kuān té xoxó ntí'xe u, ntá tsi ikán tuví nimá ko ni ntó né, dóo diní ko da kútuni ko tsí dóo vá'a ó de nto, tsi ntákuinti'xe ntí'xe nto Cristu.

<sup>6</sup>Dukuān né, vata ō kuínti'xe nto Tó'o ko Jesūcrístú ne, kuan tsi koo kuntikín ka ntó ña. <sup>7</sup>Kuinti'xe kue'en ntó ña, kutú've vá'a nto nté kui kakuinti'xe nto ña, vata tsi o nakuá'a ú nto ne, nakué'le nto sintiá'vi nta'a Xuva ko ütén uten.

#### Ntuvia xee é ni'i ko nta'a Cristu

<sup>8</sup>Koto nto tē ña ku ntíkín nto ña ntaéni nta'ví nto da ntáka'an ña nté ō ntádē kuení ña, da ntáka'an ñá dovéte. Tsí ña te ntántikín ñá Cristu, tsi da ntántikín ñá vata xkoó ini ñá'a. Ntántikín ña tú'ún ña ñuxiví sa.

<sup>9</sup>Tsí vata tsi kaa mii Xuva kō né, kuan tsi kaa Cristú dí. <sup>10</sup>Dívi ntō ne, ñá tē nté kaa nuu mé'ñu Xuva ko ntō tsi ntáduku ntée nto Cristu. Tsí dívi ña kadē kú've ñá iña un ntíí ntíí ña'a, ña ntádē kú've. <sup>11</sup>Vata tē te'nte kúñu ntō, ntá tsi ña te ña'a ni e'nté ña nto. Vata tē nima nto é tē'nte da nakuíta nto kuétsi ntō da nakáku Cristu nto. <sup>12</sup>Dā ítsi ntute nto ne, vata tē intú'xi dadíi nto nī Cristú ne, ntoto xtuku nto ni ñá dí, tsi kuínti'xe nto tsí kuvi víí Xuva ko nantōto ña ña rkontuvi dá xi'i ña. <sup>13</sup>Di'na ne, vata tē xi'i ntó kuenta iña kuétsi ntō, kuenta iña i é ña ni e'nté nto kúñu ntō. Ntá tsi tá'xi Xuva ko ntūvi iña nto dadíi ni Cristu vé ne, dē ka'nu iní ña ni ntō kuetsí nto. <sup>14</sup>Nakādí Xuva ko kuenta ko mí ūve na'a tsí ña ni de ntāa ō leí san. Xnteē ñá kuentá san ntiká krusi kan. <sup>15</sup>Dā xi'i Cristu ntíkā krusí san ne, kūvi dé ña ni ūn ntíí ntíí ña'a, ña é ña vá'a o ntádē kú've. Nánē'e Xúva ko kō tsí ña vá'a ña tsikan da kúvi dé ña ni ña ntiká krusi kan.

#### Nantuku nto nūu i iña Xuva ko

<sup>16</sup>Dukuān ne, ñá ku dā vá'a nto é ká'an ntée ña'a san nto tē né

ntaé'xi nto, o tē nee ntáxi'i nto, o tē nee ntáde nto, o tē ña ntáde nto viko san dá kanakuntéku xoó san ne, ō dá ntuvi é iō dá'na. <sup>17</sup>É un ntí'i nūu i sá'a ne, vata kaa kudii ntati nuu i é kí'xi rkontuvi. Ntá tsi nuu i é nuu é ntāa ntí'xe i ne, Cristu. <sup>18</sup>Ñá ku dā vá'a nto é nākunaa ña kini ntāa san nto, ña e dóo koñu'u kuini i, ña e ntaínuu ini i ánĵe san, ña e dóo ntántaa nuu i e kényi ña, ña ntáde na'nu kuenta iña i e ntádē kuení mii ña. <sup>19</sup>Ñá tē ntántikín ntí'xe ña Cristu, ña é odo nūu iña ña ntákuinti'xe i san. Tsí Cristú ne, kata'xi ña é un ntí'í é kantio ko, xo'ō é kuvi ō kúñu ñá ne, kade ña é koo dadíi ō vata koo é kue'nu o vatā ó ntio Xuva kō.

<sup>20</sup>Ntō'ó ne, e xí'i nto nī Cristu kuénta iña i é ió ñuxiví sa. ¿Nté kuí ntákini nūu xtuku ntu nto nuu i tsíkan? ¿Nté kuí ntáde ntu nto vatā ó ntáka'an ñá'a ñuxiví sa? Tsi ntáka'an ña: <sup>21</sup>“Ñá ku tñin nta'a sāl'a tñin nta'a tsikān nto, ñá ku e'xí nto, tsi dóo xií kaa té kuān koo vii o”. Kuan ō ntáka'an ña. <sup>22</sup>Un ntíí ntíí nuu i sá'a ne, kantí'i da ntáde tsiñu ni'i ō. Sál'a né, kúdii dá mii tū'ún ña'a san. <sup>23</sup>Nuu é ntaā i tsi dóo va'á, kuini ko, tsí vata tē ntántikín ña nchu'ún va'á, vata tē dóo ntaíko ñu'u ña, vata te ña ntáde kuení ña kuenta iña mii ña. Ntá tsi ña kaidiá'vi kue'en tsi sál'a e ntuvá'a nima kíni ntāa kō.

**3** Tsí nto'o é ntoto dadíi nto nī Cristú ne, nantuku nto nēe nuu i é káduku ntée e dukún kán mí tuví Cristu díñi kua'a Xuva kō. <sup>2</sup>Kadā kuení nto iña i é tuví e dukún kán; ñá ku dē kuení nto iña

i é ió ñuxiví sa. <sup>3</sup>Tsi é xi'i ntó nī Cristú ne, é ió va'á ntuvi iña nto nta'a Xúva kō. <sup>4</sup>Tsí mii Cristu san kúvi ña ntūvi iña ko. Tē ntii dí'tō ñá ne, dadii tsi ntii dí'tō ntó ni ñā é kaxi'í nuu ka'nu ña.

#### Ntuvi ata iña kó ni ntuvi xēé iña ko

<sup>5</sup>Nakuítá kue'en nto da nēé ka e ñu'u dukuān nima nto é kāduku ntée ñuxiví sa. Ñá ku kīdi ni'i nto ñádī'í tē ñá tē ñádī'í mii nto. Ñá vii nto é kīni kaa. Ñá vii ntó nuu i é ña vá'a, nté nuu i é kadā kuení mii ntó é kaikan nima kīni kaa nto. Ñá ku kūne'u iní nto ni tā'an nto, tsí vata te kanuu iní nto tuku xuva nto te kuān koo vií nto. <sup>6</sup>Ñā é kuān ó ntáde sán ne, ní'i kuē'en ñā é nto'o ña nta'a Xuva kō, tsí ñā te ntákuinti'xe ña ña. <sup>7</sup>Kuān o dé nto ntuvi di'na di. <sup>8</sup>Ntá tsi veví ne, nté uun ito nté uun ntuvi ká ña kú de nto nuu i sá'a: é kūdiin nto, é ñā ntío kuē'en ntó ta'an nto, é vii nto é kīni kaa, é kā'an kīni nto iña ta'an nto, é kā'an nto nuu i é ña vá'a. <sup>9</sup>Ñā ka'ān ntó dovete ni tā'an nto, tsi é nakuíta nto nima kīni kaa nto ni un ntī'i nūu i é edé nto kídaā ne, <sup>10</sup>e ní'i nto nīma xēé nto ve. Xuva kō ne, utén uten kantavá'a ña nima ko da nté ntuvá'a vata kaa mii ñā, da nté kuíní va'a kó ña. <sup>11</sup>Ñā té iní tē ñā Israeé o, o te tuku ña'a o. Ñā té iní te tē'nte kúñu ko, o tē ña'a. Ñā té iní tē ña tuku ñuú o, kuān té ña tú've ko, kuān te ntaíka o má tsiñu ne, kuān te ntaíka xaa o, tsí Cristu é kaīnuu á'vi ña iña ko un ntí'í ntí'í ó ne, nuu mé'ñu ña ko ūn ntí'í ntí'í o.

<sup>12</sup>Dōó ntio Xuva ko ntō né, nākaxnúu ña nto vata koo é ntūvi

nto iña ña. Dukuān ne, vií nto vatā ó ntio ña: ntuntā'ví ini nto ta'an nto; vií nto é vā'a ni ñā; ñá vií ka'nu nto; na kūtíi nima ntó ni ñā'a san; na kūtíi nto kuntētū nto nee é ntio nto. <sup>13</sup>Na kūtíi nto ni tā'an nto ne, kada ka'nu iní nto ni ña te ió nuu i. Vata o dé ka'nu iní Cristu ni ntó ne, kuan kōo kada ka'nu iní nto ni tā'an nto. <sup>14</sup>Dií ka vá'a ó ne, kuinima ntó ta'an nto, tsí da ntákuinima kó ta'an ko ne, uun tsi ntúvi o ni ñā. <sup>15</sup>Xuva ko na tā'xi ñā é kuntōo vá'a nto ne, nañē'e ñā nto nté koo vií nto, tsí divi tsiñu e kána ña nto é uun tsi ña'a kúvi nto. Naku'éle nto sintiá'vi nta'a Xuva kō.

<sup>16</sup>Nguentúvi tsi na kunūu tú'ūn Cristú san nima nto. Nakuā'a nto ta'an nto ne, kué'le nto ña itsi. Kata nto iña Xuva ko. Kata nto tsi dóo ka'nu ña. Kata nto nté o dé ña ni ntó. <sup>17</sup>Da nēé ka é vii ntó, é kā'an ntó ne, kuān koo vií nto kuenta iña Cristú ne, naku'éle nto sintiá'vi nta'a Xuva ko kuēnta iña Tó'o kō.

#### Nté koo vií ña ntákuinti'xe i san

<sup>18</sup>Ntō'ó ne, ñádī'í, kuinti'xe nto xii nto, tsí kuān ó ntio Tó'o kō é vií ña ntákuinti'xe i san. <sup>19</sup>Ntō'ó ne, ñatīi, kuinima ntó ñádī'í nto. Ñá ku kudiin ntó ni ñā.

<sup>20</sup>I'xá, na kuinti'xe nto é un ntī'í e ntáka'an úva nto ni di'í ntó. Sá'a é ntio Xuva kō é vii o. <sup>21</sup>Ntō'ó ne, uva i'xá, ña kú de nto é na kūdiin i'xá nto vata koo é na ki'xi iní i é vii i é ntio nto.

<sup>22</sup>Ntō'ó, ña ntáde tsiñu, kada ntaa nto é un ntī'í e ntáka'an tó'o ntó, ña ntoo ñuxiví sa, ñá te da mii tsi dá kaito ñā, tsí kaníi nima ntó, tsi

ntákuinti'xe nto Xuva kō. <sup>23</sup>Da nēé ka nee é vii ntó ne, kaniī nima ntó vii nto, vata te iña Tó'o ko kāde nto, ñá te iña ña'a. <sup>24</sup>Ini ntó tsi tá'xi Xuva ko nto iña ñá doméni, tsí kade tsiñu nto iñá Cristu, divi ñá e Tó'o nti'xe ko ñá. <sup>25</sup>Xoó ña'a é kāde ñá é kīni kaa ne, ní'i ñá é kīni kaa, tsí ñá káde Xuva ko kuēnta te ka'nu ñá'a ñá, o tē ñá ka'nu ñá'a ñá.

**4** Ntō'o e tó'o tsiñu kúvi nto ne, vii nto é vā'a nī ñá ntáde tsiñu iña nto. Naka'an ntó tsí io Tó'o ntō, ñá é kadē kú've iña nto e dukún kán.

<sup>2</sup>Ñá tee dā'na nto é kā'an ntá'ví nto. Ñá kú xkukídi naá nto, ntá tsi naku'é'e nto sintiá'vi nta'a Xuva kō. <sup>3</sup>Ka'an ntá'ví ntó iñá nti dí te ta'xi Xuva ko te kúvi ka'an ntódo nti tú'ün va'á san iña ñá, te kúvi ka'an nti nuu i é tuvi xu'u iñá Cristu, tsí kuenta iña tú'ün san é nuu kutū u. <sup>4</sup>Ka'an ntá'ví ntó te kúvi ka'an va'á u vata koo é tēku va'á ña'a san.

<sup>5</sup>Koto nto é vii nto é vā'a ni ñá'a, ñá ntákuinti'xe i san. Koo ntii nto kada tsiñu nto vevii é ió ka ntuvi.

<sup>6</sup>Ka'an vá'a nto ni ñá'a san vata koo é nā xkúntee iní ñá é kīni ñá. Kutú've nto nté koo nantiko koō ntó ni ñá'a nēe é ntio ñá kutuni ñá.

### I'a ntí'i tutú san

<sup>7</sup>Ení ko Tiquicu, ñá e dóo ntio kó ne, un vá'a tsi xntíi ñá ko. Dadii tsi ntáde tsiñu ntí ni ñá iña Tó'o kō. Kuni'i ñá tú'un iñá ko ve. <sup>8</sup>Tsi táxnūu ú ñá vata koo é kā'an ñá ni ntō nté o de nti, vata koo é na nāku'ún ka'nu nima nto. <sup>9</sup>Ntini'i ñá Onēsimu, ñá e dóo ntio ko, ñá e dóo

ini dé ntaa, divi ñá é kāduku ntée ñá nto. Ntaa ñá ni ntō é un nti'í é kākuví i'a.

<sup>10</sup>Aristarcu, ñá é ñu'u kutū ntí ni í né, taxnūu ñá ntiusi nto. Marcú dí, ení Bernabee. É kāká'an u ni nto kuēnta iña ñá. Te kī'in ñá kikoto ní'ni ñá ntō ne, vá'a kōo vii nto ni ñá. <sup>11</sup>Jesuú, ñá é nani Justó dí ne, taxnūu ñá ntiusi ntó dí. Da mii ñá sá'a é un nti'í nti'í ñá Israee, ñá ntákuinti'xe i san, dé tsiñu ntí ni ñá iña Xuva ko. Dōo náxnūu ka'nu ñá nimá ko. <sup>12</sup>Eprafa, ñá ñuú nto, ñá é kade tsiñu iñá Cristú ne, taxnūu ñá ntiusi ntó dí. Utén utén kaka'an ntá'ví ñá iña nto é kuntikín xntó Xuva kō, é kaniī nima ntó vii nto é ntio Xuva kō. <sup>13</sup>Xu'ú ka'an ntaa ú tsi dóo kadē kuení Eprafá san kuenta iña nto, ñá ntoo ñuú Ladicea ni ñá ntoo ñuú Hierapolí dí. <sup>14</sup>Luca, ñá medíku e dóo ntio kó ne, taxnūu ñá ntiusi nto, ní Demá dí.

<sup>15</sup>Ká'an ntō ntiusi ní ñá ntákuinti'xe i, ñá ntoo ñuú Ladicea. Ká'an ntō ntiusi ní Nifá, nī ñá ntákuinti'xe i sán dí, ñá ntánataká nuu nú vi'i ñá kán. <sup>16</sup>Tē kúvi naku'á'a nto tutú sa'á ne, taxnūu nto ñuú Ladicea, na naku'á'a ñá ntákuinti'xe i, ñá ntoo ikán, dí. Naku'á'a nto tutu e táxnūu ú iña ñá dí. <sup>17</sup>Ká'an nto ni Ārquipú te na kōto ñá te kāda ntaa ñá tsiñu é téé tsiñu Xuva ko ñá.

<sup>18</sup>Xu'u é Pablú u ne, nta'a mii kó kaka'u u é taxnūu ú ntiusi ntó dí. Naka'an ká nto tsí nuu kutū u. Kūnuu mé'ñu kunuu dava Xuva ko ntō. Kuan tsí koo é kā'an u ni ntō.